

INUIT ATAQATIGIIT INATSISARTUNI



13. august 2026

EM2026/297

Inatsisartut Suleriaasianni § 33 naapertorlugu aalajangiiffigisassatut siunnersuut matumuuna saqqummiuppara:

Naalakkersuisut peqquneqarnissaannik Inatsisartut aalajangiiffigisassaattut siunnersuut, nuna tamakkerlugu illoqarfinni nunaqarfinnilu tamani namminersortumik nalilersuisussanik atorlugu namminersortut inuussutissarsiortut pisortallu sulisoqarneranni piginnaasatigut pisariaqartitat pillugit misissueqqissaarnermik ingerlataqaqqullugit. Misissueqqissaarnerup suliffeqarfiit piginnaasanik pisariaqartitaat qulaajassavai kiisalu nunatsinni ilinniarsiit ilinniakkanik pikkorissarnermillu neqeroorutaasa naleqqussarneqarnissaannut salliutinneqarnissaannullu tunngavissiissalluni. Misissueqqissaarnerup kingusinnerpaamik UPA 2028-imi Inatsisartunut saqqummiunneqassaaq.

(Inatsisartunut ilaasortaq Nivi Heilmann Efraimsen, Inuit Ataqatigiit)

Tunngavilersuut

Kalaallit Nunaat ukiuni aggersuni inuiaqatigiinnut pingaarutilinnik annertuunillu suliassaqaqpoq. Ineriartorneq pisortat namminersortut inuussutissarsiortut suliassaqaqfiini annertusiartuinnartunik piumasaqaateqaqpoq, taamaattumillu inuiaqatigiinni suliassat taakku naammassineqarnissaat eqqarsaatigalugu pisariaqartinneqartunik suliamut tunngasunik piginnaasaqarnissaq aalajangiisuusumik pingaaruteqaassaaq.

Inuit Ataqatigiit sulissutigaa Kalaallit Nunaat akisussaassuseqartumik, alloriartuaartumik isumannaatsumillu ineriartornikkut namminersulivinnissaa. Tamanna anguneqassappat nunatsinni inuiaqatigiinnut suliassanik amerlanerusunik qaffasissumik piginnaasaqarluni isumaginnissinnaanermut pisariaqartinneqartunik piginnaasanik ineriartortitsillunilu attassiinnarnissaq pingaaruteqarlunnaqpoq. Taamaattumik politikikkut aalajangiinerit ilisimasatigut tunngavissaqarlunnaqpoq pisariaqarpoq.

Taamaattumik Inuit Ataqatigiit isumaqarput namminersortut inuussutissarsiortut pisortallu sulisoqarneranni nuna tamakkerlugu illoqarfinni nunaqarfinnilu tamani piginnaasatigut pisariaqartitat pillugit namminersortumik misissueqqissaarnermik ingerlatsinissaq pisariaqartoq. Sulisartut pillugit ilinniarsimasullu amerlassusaat pillugit kisitsisit pigineqaraluartut, Inuit Ataqatigiit isumaqarput Kalaallit Nunaanni maanna siunissamilu piginnaasatigut pisariaqartitat tamakkerlugit ersersinneqarnissaannut ataatsimut isiginnittumik periusissiamillu tunngaveqartumik ilisimasatigut tunngavissaq amigaataasoq.

Akuttunngitsumik innuttaasunit tusartarparput ilinniakkaminnik naammassinnereerlutik suliffissarsiortut suliffissarsiuminaatsitsisartut. Taamaattumik isumaqarpunga ukiuni ingerlaneranni ilinniakkat pikkorissarnerillu suliffeqarfiit pisariaqartitaannut naammattumik naleqqussarneqartarsimannginnerat tamanna pissutaasinnaasoq.

Taamaattumik misissueqqissaarnerup takutittariaqarpaa nunatsinni aammalu illoqarfinni nunaqarfinnilu ataasiakkaani ilinniarsimasunik sulisussanik qanoq amerlatigisunik pisariaqartitsisoqartiginersoq. Assersuutigalugu nakorsat, ilinniartitsisut, sanasut, inatsisilerituut, aningaasaqarnermik ilisimasallit,

INUIT ATAQATIGIIT INATSIARTUNI



ilisimatuut, isumaginninnermi perorsaasut, angalanermi aqutsisut (skipperit 1. grad), AC-mi fuldmægtigit il.il. qanoq amerlatigisut pisariaqartinneqarnersut qulaajarneqassaaq.

Ilisimasaq tamanna pisariaqarpoq nalilersorniarlugu nunatsinni ilinniakkat pikkorissarnerillu suut unitsinneqassanersut, suut pilersinneqassanersut imaluunniit suut salliunneqassanersut, taamaalilluni ilinniartitaanermut aaqquissuusaq suliffeqarfiit pisariaqartitaannut ingerlaavartumik naleqqussarneqarsinnaaqqullugu aammalu innuttaasut ilinniagaqassusiat qaffassarneqaqullugu. Inuit Ataqtigii isumaqarput tamanna Kalaallit Nunaanni imminut napatissinnaanerulernissamik anguniagaqarnermut qanimut attuumassuteqartoq.

Peqatigisaanik Inuit Ataqtigii isumaqarput pisortat ingerlatsiviisa nukittuut innuttaasut suliaminnut piginnaasaqarluartunik sulisunik naapinneqartarnerannik tunngaveqartut. Taamaattumik misissueqqissaarneq Kalaallit Nunaanni piginnaasatigut tunngavimmik sivisuumik isigalugu ineriartortitsinermit tapertaassanngilaq kisiannili aamma pisortat suliaminnik pitsaasumik naammassinnissinnaanerit, oqartussatut suliaasunik suliamut naleqquttumik ingerlatsinissaat kiisalu innuttaasut inatsisitigut illersorneqarnissaat qulakkeerniarlugu iluaqutaassaaq.

Misissueqqissaarneq aammattaq qulakkiissavaa siunissami ilinniartitaanermut tunngasut pillugit aalajangiinerit Kalaallit Nunaanni piginnaasatigut pisariaqartitat pillugit uppersarneqarsinnaasunik paasissutissanik tunngaveqarnerullutik ingerlanneqarnissaat. Taamaattumik siunnersuut siunissami ilinniartitaanermut aaqquissuussinerup naleqqussarneqarnissaa ineriartortinneqarnissaalu pillugit periusissatigut aalajangiinissamut tunngavissamik pilersitsinissamik siunertaqarpoq. Nunatsinni siunissami piginnaasatigut pisariaqartitat ataatsimut isigineqalerpata ilinniartitaanermut suliniutit pilersaarusiorneqarsinnaapput, pisortat namminersorlutillu inuussutissarsiortut suliamut piginnaasaat nukittorsarneqarsinnaapput, oqartussatut suliat suliamut naleqquttumik ingerlanneqarnissaat tapersorneqarsinnaavoq kiisalu akisussaaffeqarfiit siunissami tiguneqarsinnaasut pillugit paasissutissanik tunngaveqarluni akisussaassuseqartumillu salliussisoqarsinnaavoq.

Taamaattumik aalajangiiffigisassatut siunnersuut manna saqqummiunneqarpoq.

Pisortanut aningaasatigut allaffissornikkullu kingunerisassat

Siunnersuut akuersissutigineqarpat naatsorsuutigineqarpoq aningaasatigut allaffissornikkullu kingunerisassat AC-mi fuldmægtigip ukioq ataaseq sulisimaneranut naapertuuttussat, tassa missaanik 500.000 kr.-it. Tamatuma saniatigut paasissutissanik katersinermit, misissueqqissaarinermit aammalu pisariaqartillugu avataaneersunik ikiorteqarnermit aningaasartuuteqartoqarsinnaavoq, Naalakkersuisut suliaq qanoq aaqquissuunniarneraat apeqqutaalluni.

Namminersorlutik inuussutissarsiortunut aningaasatigut allaffissornikkullu kingunerisassat

Toqqaannartumik aningaasatigut imaluunniit allaffissornikkut kinguneqassanngilaq. Misissueqqissaarnerup ingerlanneqarnerani suliffeqarfiit attuumassutillit, inuussutissarsiortut kattuffii kiisalu suliffeqarnermi illuatungeriit attuumassuteqartut peqataatinneqarsinnaapput.

INUIT ATAQATIGIIT INATSIARTUNI



Innuttaasunut aningaasatigut allaffissornikkullu kingunerisassat

Toqqaannartumik aningaasatigut imaluunniit allaffissornikkut kinguneqassanngilaq.